



UNIVERSITÄTS-  
BIBLIOTHEK  
PADERBORN

## Universitätsbibliothek Paderborn

**Iacobi Lobbetii Leodiensis E Societate Iesv. Specvlvm  
Ecclesiasticorvm, Ac Religiosorvm.**

**Lobbet de Lanthin, Jacques**

**Leodii, 1640**

Argvmentvm, Partitio, Et Finis Totivs Operis.

[urn:nbn:de:hbz:466:1-47105](https://nbn-resolving.org/urn:nbn:de:hbz:466:1-47105)



## ARGVMENTVM, PARTITIO, ET

FINIS TOTIVS OPERIS.

**I**N hoc opere, mihi animus, & consilium fuit; ex ipso nomine, natura, ac functionibus Ordinis Ecclesiastici; tanquam è visceribus causæ, eruere opportuna formandis moribus documenta, vt in omnium oculis, essent ea bonæ mentis decora, quæ illos ornare debent, quos amabilis Dei prouidentia suis aris ad-mouerit.

Vt autem in hoc argumento, aliquo rerum ordine, nexuque procederem, putavi ab infimis ad summa mihi gradum esse ponendum. Itaque primum initium duxi à Clerico, eiusque etymologia, Tonsura, & Corona: tum ad sacros Ordines, quibus initiatur, ascendi: tum etiam ex ipsa veste, quæ corpus illius tegitur, euasi ad animum, cui (vt ait D. Gregorius Nyssenus) pro veste est ipsa virtus: *De Opif. Hom. 5.* tum denique paucis attigi præcipua status illius munia, qualia sunt SS. Missæ sacrificium, Canonica Horarum officia, aliaque his affinia, in quibus quis esse debeat religiosæ mentis æstus, è sacris cæ-

a a

remo-

ARGUMENTVM.

remonijs, deduxi. Et hæc de argumento mihi proposito; de titulo, etiam pauca.

Placuit in fronte huiusce Libri, ascribere illud. *Speculum Ecclesiasticorum, ac Religiosorum*; quia & his, & illis suus olim fuit, atque etiamnum est, speculorum vsus: quem ne damnes *amice Lector*, attende quid ab illis æterna Dei sapientia voluerit deriuari.

Ex eius nutu, ac præcepto altare holocausti fabricauit Moyses, & fecit illi, *labrum æneum cum basi sua de speculis mulierum.*

Quæ porro fuerint ea specula, cuiusque materia, lis est inter Authores, eaque adhuc sub iudice. Sunt enim qui velint fuisse è puro, nitenti que crystallo; sunt qui ex ære solido fusa, quibus scilicet eoloci, ac temporis Iudæas mulieres vti solitas testatur Rabbi Abraham, & Philo Iudæus, cuius hoc est de illis luculentum testimonium. *Specula, ad quæ formam curare solite, sponte, nemine iubente Deo dedicauerunt; hæc ad se delata, opifex in vnam massam confuderat: vel quod malim, appenderat ad labrum æneum; veluti desumptum è mundo muliebri, pium anathema. Sed quos, inquis, in vsus? is in aperto est, & clara luce; vt videlicet Sacerdotes operaturi sacris, seipso prius in illis spectarent, discuterentque probè, num forte esset aliquis in facie næuus, aut macula, quæ eam deturparet.*

Quod

ARGUMENTVM.

Quod si ea corporum cura fuit, quæ esse debuit animorum? certe quam maxima. Et verò hanc vnã spectabat ille ritus, monebatque, vt ab illorum munditia, ad horum cultum, nitoremque procurandum, eo speculo, tanquam oculo, ducerentur.

Atque hoc ipsum est, quod exiguo opere mediator; sacra quippe Christianorum adyta subituris, speculum offero, ad quod conscientiam, ceu animæ faciem, examinent, videantque num is sit in ea decor, is nitor qui Ordini Ecclesiastico, ac Religioso conueniat; qui superos oblectet, qui Dei ter Opt. ter Max. conspectum non reformidet. Videbunt autem si seipfos vel de nomine nouerint, seduloque perpenderit quis debeat esse Clericus, Religiosus, Sacerdos, Pastor, Præsul: & quæ horum, atque illorum officia.

Ea porro omnia in hoc volumine, velut in speculo, proponenda duxi, ad virtutis studium, & cultum animorum, cui comparando, ex vitæ suæ instituto, Ecclesiastici omnes ad laborare tenentur; tum quia in eos tanquam in specula quædam animata cæteri mortalium oculos conijciunt, tum quia (vt in simili Salustius) etiam ipsi *magno imperio præditi in excelsis atatem agunt, & eorum facta cuncti mortales nouere*: ideoque eiusmodi esse oportet, quæ omnibus ad bonum stimulo esse possint, atque exemplo. Hoc si impetrem, ampla erit exiguo labori merces,

In Con-  
iurat. Ca-  
tilinæ.

ARGVMENTVM.

merces, & tibi, *beneuole Lector*, magnus à cœlo  
prouentus; quem si non assequar, non dubitabo  
cum Saluiano dicere.

*Hoc ipsum infructuosum saltem non erit, quod pro-  
desse tentavi. Mens enim boni studij, ac pij voti,  
etiamsi effectum non inuenerit boni operis: habet ta-  
men premium voluntatis.*

IACOBI

